

2701257  
38  
:8

共計八冊

永順縣志





原序

永順在漢時為武陵地僻處洞庭之西  
控荆湘通巴楚南中險要之區也入元  
以來為彭氏所有世襲土職相延幾五  
百年中國僅羈縻之而已是以聲教不  
通民生其間卉衣木食未識文物聲明  
冠裳禮樂之制雖土司間有紀載亦荒

永順縣志

卷末序

略難稽不足傳信後世迨

本朝

歷聖相承風化所及靡不歸誠雍正丁未歲土  
官彭肇槐獻籍歸流

世宗憲皇帝憫其嚮慕之殷

特允所請改永順司為永順府析其地為永順  
龍山二縣而以新設之保靖桑植附焉





自是以來城郭學校官司吏舍漸次興  
舉而永順遂成一都會矣永順縣為附  
郭首邑蒞茲土者宜宣

上德意教養撫綏俾新闢之境沐膏澤而忘  
勤苦以遂安居樂業之性而表章

聖治勒為一邑之書亦正所以彰王會大一  
統也前令河陽李君已基其事

今上御極之二年廣元王君調任此邑詳閱  
舊本尚多缺畧且戶口日增人文漸起  
踵事增華若有待者乃秉繩郡守李侯  
加意搜輯越癸秋而書始成適予奉

命來撫湘南下車後校閱版圖知永順一縣  
重岡複嶺廣袤千里蠻烟瘴雨中今已  
雞犬桑田鱗次相望閱王君所纂風土



官師祀典賦役諸志更班班可考嗣此親民之官能實力愛養磨鈍礪頑則十年以前之風俗至此一變者歲月滋深當更有進於斯也予於守令固有厚望亦用以自勉焉是為序

賜進士出身

南書房供奉

永順縣志

卷末序

經筵講官

日講官起居注翰林院侍講學士內閣學士兼禮部侍郎吏部左右侍郎兵部右侍郎都察院右副都御史巡撫湖南世襲一等輕車都尉加二級紀錄二次蔣溥撰



永順縣志原序

廣元王君令永順既報最在任需次即官  
乃以暇日纂輯邑志据舊本核訂成書  
將授梓適予校士抵郡得借覽焉夫邑  
必有志尚已而永順之志則所係有特  
重焉者按永順漢地理志屬武陵郡兩  
晉迄隋隸辰州刺史唐曰溪州統係內

地梁一平時彭城任溪州刺史竟為永  
順土司之祖暨宋元明竊據八百餘年  
以彼大姓遞傳素積威約且性獷悍唇  
齒西南陲往往自相讐殺中間置官修  
貢時復効順特羈縻勿絕而已其能戢  
豕突狼奔之故智惴服中心哉洪惟我  
國家累洽重熙德化浹於肌髓



世宗憲皇帝御極之五年遐邇禔福依山阻水  
之倫納款來琛頓顙恐後而永順土司  
彭肇槐遂以是歲因大吏達獻土之忱  
邀

恩俞允改其地併保靖桑植兩舊司地為郡永  
順為附郭首邑凡城池學校壇廟公署  
圻堠以暨一切興舉建設之宜罔不次

第就理千百年阻昧幽深之域煥焉胥  
耀於光明史冊所僅覩也夫事當創始  
則諮訪鮮憑而地屬巖邊則講求貴悉  
此永順縣志所以特重於他郡邑志而  
王君搜採精確擘畫周詳用意良深厥  
功為甚鉅也余兩涉斯土水陸之崎嶇  
尚壑之蒙密所目睹身親者按志以稽



歷歷如指諸掌誠哉可以信今而傳後  
矣惟是永順向隸土司僻處荒隅舟車  
罕至聚族耕食以養以生茲者地不加  
闢而表為大都駐以重協兵民叢集生  
齒日蕃改設以來米粟百貨之值稍稍  
增矣樵採之跡漸入窮巖物力亦頗絀  
矣苟欲旁資輸運而千尋飛瀑之灘一

線懸崖之道人徑欲絕費輒不貲又界  
連巴夔諸蠻即王村以西孔道怪石如  
林奔濤怒吼過牛路河則衆流直注郡  
城而從近郡之金魚塘俯瞰城市烟火  
依依勢同釜底懋遷匪易生殖維艱守  
土者所共念也余謂為永順計不得狃  
目前無虞而務期經久可恃俾火種刀



耕之俗不憂人滿田磽捫竒涉險之區  
有以固圉足穀迺益澤以詩書導之禮  
讓永沐

聖朝庥明之雅化而幾幾與內地編戶等此  
固非獨邑宰責也而鳴琴奏績其亦將  
披閱斯志而亟籌所以撫綏保障之方  
乎王  
重移有日矣特推廣其意以為

後來者告幸勿等之他郡邑志徒備覽  
觀可也乾隆九年九月吉旦湖南督學  
使者山陽阮學浩謹題於星沙使署





國家聲教四訖幅員寔廣未有如我朝之盛者也

列聖相承重熙累洽垂以

聖祖仁皇帝六十年深仁厚澤海內嚮風極於邊徼遐荒郡縣規置非復疆圉可域

世宗皇帝善繼善述於由舊之中寓維新之意量其土宇酌以阪章增廣天下郡縣未

永順縣志

卷末序

易僕數荆楚居國南鄉永順僻處武陵元明以來韋彭竊據雖奉

天朝正朔勅襲土司而未嘗入隸版籍雍正六年強者請朝弱者恐後

朝廷嘉惠元元一視同仁改司而府永順即其首邑也益以龍山保靖桑植則儼然一郡矣官斯土者勞心撫字樂事勸功



廣教化而美風俗也豈不偉哉

今天子軫念邊民猶恐弛屢未同

特命藩宣留心綏牧余承乏以來未嘗不與  
守令諄諄也年來沐我膏澤忘其勤苦  
有徧德而無梗化然後知

朝有善政則野有淳風正不在道里之遙  
山川之間耳第念採風所至而紀載無

聞斯亦拓土開疆之缺典也適聞誌有  
成書邑無不備其風土人情畢具於篇  
章尺幅之中余雖不文而班班可考未  
嘗不嘆李侯之善作而嘉王令之善承  
也是亦為之序

湖廣湖南承宣布政使司布政使前刑  
科掌印給事中紀錄九次長柱撰



志乘何昉乎嘗考周禮職方氏掌天下之圖以掌天下之地辨其邦國都鄙四夷八蠻七閩九貉五戎六服之人民與其財用九穀六畜之數要周知其利害此乃志之所自權輿而後之郡縣遂各有紀載矣湖南永順一府地處蠻陬三代時在禹貢荊州之徼秦屬黔中漢隸

武陵郡晉宋齊梁因之陳隸沅陵隋隸辰州唐天授間析辰州置溪州靈溪郡屬江南黔中道宋為永順州元為會溪施容隸思州安撫司明為南渭施溶上溪等州臘惹麥着驢遲白厓田家等洞長官司

國朝因之雍正五年土司彭肇槐荷



聖朝重熙累洽之化遂獻籍內屬請設流官  
世宗憲皇帝俞允始置永順府以其地析縣三  
為永順為龍山並以新設之保靖桑植  
附焉而永順一縣則附郭首邑也余嘗  
思天地屯蒙之運必俟有首出庶物之  
聖人而後能化其狂獠椎魯之風以隆  
禮樂衣冠之盛當夫天造草昧之時六

合芸生八紘庶類蔑弗卉衣木食穴居  
堊處罔明親義序別之方今之所謂禮  
樂之邦文明之地若齊若魯若燕若晉  
若秦若豫若吳若越非累姓奕禩沐浴  
涵濡於聖人之教澤曷克臻此永順一  
郡僻在南服其民耕鑿於蠻烟瘴雨荒  
林叢箐之中拮据卒瘁又不幸而為土



首之部落未聞訓以敦龐親遜之道惟苛斂暴使鞭撻斬艾之而已耳民何以堪其又惡知

聖世蒸民之樂乎比於茲得列郡縣齒為編民斂有則役有程罰有條青有赦訓以仁義導以尊親示以恭儉恤以慈惠澤以詩書昭以文物我覩斯民其漸洗侏

儻椎結之荒陋而日遷善於風動時雍之化矣乎猗歟休哉苗民何幸而際此耶是豈非生值

聖明而此方屯蒙之運將進而覲離明豐豫之象也耶傳記所云堯舜之世無一夫之不獲者今乃得身親見之矣永順初闢向未有志河陽李君創其大凡繼得



廣元王君調任斯土復加意搜輯力仔  
考訂而全帙始告成

大中丞蔣公以椽筆弁其首督學阮公觀  
察明公並為製序余復何言第欽惟我

國朝

相承愷澤覃敷湛恩汪濊九州之外六合  
之內血氣之倫含生之屬鮮不遂其生

聖聖

永順縣志

卷末序

十三

若其性以涵濡煦嫗於太和翔洽之中  
矧永順亦禹跡所揜並列荊州之域蚩  
蚩苗氓皆

聖天子之赤子守斯土牧斯民者宜何如敬  
體

當宁宵旰之勤勞精白乃心以養以教登此  
苗民之仁壽恬愉之衽席耶廣元王君



裒集斯志其用意良深洵善於牧民者  
耶是志也非僅載山川疆域形勢阨塞  
與夫賦稅之則戶口之數學校官師兵  
防物產災祥之大較也將以誠民阜物  
簡俊化頌俾成一  
道同風之治望之來  
者相嗣於永永勿替也於是乎書  
時

乾隆九年旃蒙赤奮若之歲室竊月上  
巳之辰湖南觀察使者玉峯徐德裕題



前署府景序

縣何以永順名曰義取乎永順故名之也名自今始乎曰前此亦以是名矣然則奚爲其地改而其名不改也曰改土之意出自土官

天子嘉其恭順俯允所請不改其名者示順也雖然昔之名則統其地而名之今之名則又分其地而名之也曷分乎爾曰龍山亦永順故地而首邑則獨仍其舊所以爲分也其獨名是邑者何曰改土設都土分二邑外此而保靖隸之桑植又隸之故郡

之名是名者重乎其統之也而邑之名是名者又重乎其倡之也曷爲乎其倡之曰各宅爾宅順民居也各田爾田順民生也法制禁令順以防民情也禮樂詩書順以導民性也順之義大矣哉夫苗民古稱逆命矣逆而順格之上以順施下以順應其心順其風亦順永永無極他邑胥是改焉夫而後邑之名以稱郡之名亦以稱乎余不敏忝守茲土喜斯民日沐大順之化熙熙然咸順

帝則以成至順之休也爰是卽名考義綴數言以志其



槩若夫星野疆域山川風物以及制度文章之詳  
則前人述之已備茲不復贅云

時

乾隆十年歲次乙丑姑洗月

誥授奉政大夫署永順府事常德府清軍同知加  
一級紀錄七次三晉景士鳳苞九氏題



前府戴序

溪州黔中一隅地也漢晉以來隸屬不恒自宋始有永順之目在元爲路置安撫司治之前明則有軍民宣慰司之設領州三長官司六其地依山阻水廣袤一千三百餘里西通蜀省東界辰陽舊稱苗疆巖邑土司彭氏世襲其職然與內地隔絕曩者特羈縻之耳非聲教所訖之區也我

國家

聖聖相承鑼鼓咸育矧在花裙毳被之倫漸摩尤易雍

永順縣志

卷末

序

十七

正七年有土司彭肇槐者爲江右參戎獻土歸流民皆輸款於是更立郡縣而首縣之名卽因乎郡郡迄今六十餘載絕無蠻觸之爭不聞桴鼓之警蓋駸駸乎與內地等矣若夫紀載之編則有宣慰司藍本體裁未協語焉不詳前令李君瑾創爲邑志由是綱舉目張然而規模雖具缺畧猶多今

上

御宇之初王君伯麟踵輯成書足補李志所未逮職官人物則援古以準今食貨征徭亦分門而別類彬彬乎成一邑之信史焉惟是土風日上而歲籥



遞更事既增於前則文難循其舊顧使六十餘載  
之事蹟任其湮沒而不彰可乎余奉  
命來守是邦席未暇暖會有修輯邑志之役今令尹  
黃君德基首蠲廉俸爲之倡導闔邑紳士輸助爭  
先於是遠延名宿近習耆儒刪繁汰雜厥有典裁  
公暇每發而讀之仰見我

皇上久道化成邊徼靜謐漢籍固有以化其椎魯之風  
而人文蔚起土苗亦有以馴其犷悍之氣而耕作  
盡興從此涵濡不已將見里爲冠蓋門成鄒魯不

永順縣志

卷末

序

十六

難駕內地而上之是則余之所屬望於官斯土者  
而豈第爲異日之徵文考獻地哉  
乾隆五十八年歲在癸丑九月穀旦  
賜進士出身知永順府事燕山戴求仁書



前護道陳序

永順爲楚巫中之地羣蠻所在自秦罷侯置守分天下爲四十郡而黔中居荊州四郡之一漢曰武陵今常德澧州及永順諸境地也稽之分星皆入軫十度一度計二千餘里而永順居楚之尾又軫分中一芥子耳然而叛服不常五代馬楚時有蠻酋彭士然者降於楚將劉勅乃立銅柱於茅坪之東銘文可誦宋雖混一僅列諸蠻傳中未歸流內銓也明因元制改安撫司爲宣慰使司屬湖廣行

永順縣志

卷末

序

十九

省尋改屬都司其時雖有三州六長官之設而彭氏子孫猶世襲其職未入編戶至我

朝定鼎以來百年化洽土司彭肇槐始以其地來獻事在雍正七年自是苗疆無不則壤成賦此永順郡之所由昉也郡領縣凡四而永順首邑附郭尤劇前令李君瑾因宣慰司舊志纂輯成編使沿革可考今

上

御極之初指示體例詔修一統志於是各省郡縣志次第興修王君伯麟所輯永順一志較之李志固



加詳矣迄今五十餘載疆域山川依然如故而戶口日滋人文日起忠孝廉節之事筆不勝書黃君德基懼其久而遂湮也設局分曹周諮博採折衷於作手効伎於羣材屬藁粗定具以狀白於郡郡伯戴近堂先生固余夙所兄事者由嘉應牧遷秩於斯政成期月大小中程而且才擅史長揚扞必當將付之剞劂氏矣重陽後三日過訪辰署問序於余並出其弁言相示典要詳明不惟開卷了然無美不備仰見我

國家重熙累洽所謂海隅日出罔不率俾者卽以永順一邑言之古來干羽之格無以踰此於乎盛哉近堂行復奏最苗疆倘得借寇將必里爲寇蓋門成鄒魯有如公之所屬望於良有司者余亦奚能贅一詞乎然余兼攝監司例得爲糠粃之導爰不辭而爲之序云時

乾隆五十八年歲在癸丑九月

穀旦

護理湖南辰沅永靖道知辰州府事雲間陳廷慶書



前序

郡邑之有志乘尚矣然事非經始援據舊文不過  
踵事增華鋪張揚厲亦易易耳若夫地本荒裔邦  
無文獻則考訂也難者舊無傳人情椎魯則咨訪  
也難未入輜軒之採又鮮故府之存則搜羅旁輯  
也更難是冰身親其事經營創始烏能綜核精詳  
旁通而曲致哉以觀 李公所修之邑乘不禁歎  
美不置也永順素為苗地今

天子即位之五年前宣撫司今江右叅戎彭君肇槐奉

永順縣志

卷末 序

二十一

上印章圖籍陳請歸入內地

督撫兩憲奏章入告

天子嘉其意

特允所請於是開設郡縣而永順為附郭之首邑况屬  
創始之時機務殷繁必得賢能夙著通明曉暢者  
始稱厥職 大憲於全楚牧令中屈指甄別曰是  
非李君不可於是合詞具 題八年春公始奉

旨自辰移永任事以來上體

聖主惠養黔黎至意凜遵

各憲暨

府憲成規披草



萊剪荆棘建城設署均賦分疆苗土民之秀俊者  
教以詩書窮乏者資以衣食五年中櫛風沐雨不  
避險阻而永順一區聲明文物駸駸乎幾同內地  
矣政事之暇慨然曰傳誌無聞後之未者將何所  
考鑿爰咨謀博採而山川勝蹟天文田賦之類棋  
布星列歷歷如指諸掌書甫告竣而公陞本府  
別駕正恩以檇散庸材得繼公後入境之初見  
郊壇城市阡陌津梁秩然修舉而且邑有絃歌民  
皆買犢因以知俗無美惡得治人而可治地有顯

永順縣志

卷末

序

晦遇明時而始彰而益以見

聖恩廣被無遠弗届即此蠻烟瘴雨之區之沾  
王化頓改舊觀而我

皇上之建極中和時雍於變高邁百王遠矣彼夫漢唐  
之世嶺表滇黔視為邊徼朱崖銅柱比跡要荒而  
士大夫身處其地者不啻寄居絕域窮悴焦勞以  
視今日同軌同文之盛治即蠻獠亦化為仁里其  
廣大更為何如而公又宣猷布化其治行又何  
如耶恩不敏幸承公後嘉言善政播之里巷傳



之方冊庶幾亦步亦趨或可寡過已夫爰贅荒詞  
附於大君子之後湖南永順府永順縣知縣前知  
湘鄉縣事姚江徐正恩敬識



永順縣志原序

縣何以永順名曰義取乎永順故名之也名自今始乎曰前此亦以是名矣然則奚為其地改而其名不改也曰改土之意出自土官

天子嘉其恭順俯允所請不改其名者示順也雖然昔之名則統其地而名之今之

名則又分其地而名之也曷分乎爾曰龍山亦永順故地而首邑則獨仍其舊所以為分也其獨名是邑者何曰改土設都土分二邑外此而保靖隸之桑植又隸之故郡之名是名者重乎其統之也而邑之名是名者又重乎其倡之也曷為乎其倡之曰各宅爾宅順民居也



各田爾田順民生也法  
示令順以防  
民情也禮樂詩書順以導民性也順之  
義大矣哉夫苗民古稱逆命矣逆而順  
格之上以順施下以順應其心順其風  
亦順永永無極他邑胥是改焉夫而後  
邑之名以稱郡之名亦以稱乎余不敏  
忝守茲土喜斯民日沐大順之化熙熙

然咸順

帝則以成至順之休也爰是即名考義綴數  
言以志其槩若夫星野疆域山川風物  
以及制度文章之詳則前人述之已備  
茲不復贅云

時

乾隆十年歲次乙丑姑洗月



誥授奉政大夫署永順府事常德府清  
軍同知加一級紀錄七次三晉景士鳳  
苞九氏題

永順縣志

卷

序

二十六



永順縣志前序

永順之改土設縣也在雍正之六年永順縣之有志也創於前任李君麟以乾隆己未歲以興寧宰奉

命行取旋調尹茲邑候選取下車始取李君所創之志讀之竊喜新闢巖疆規模具備想見良工當日經營心苦也數年來留意訪諮覺舊本有未備者尚宜增有似冗者尚宜削且計編戶昔僅四萬有奇今則四倍之矣計人文昔猶學額未設今則遊庠

中式者漸且後先繼武矣禮教日嫻風俗日異官斯土者因時制宜其間司草損益亦不無踵事增華焉矧李君所鐫之板舊藏省會今求之不可得重修之責將誰諉歟是閱幾寒暑之廣搜博採更於壬戌編甲時親履各地週遭千餘里目審山川之形勢耳察方俗之語音爰以李君本為基址以土司舊志為垣墉並採辰長諸志為丹雘而規矩準繩則一稟於郡尊李公麟則僅操斧斤以從事焉癸亥秋告成



為目一十有三為卷凡四視李君本幾倍之披覽之餘覺城市村墟人物風土較十年前李君創始時又別焉始知文明之地十年不過循其常荒僻之區十年頓已改其舊也獨是麟也謬荷拔擢於茲五秋需次銓除或倖以量遷行矣他日賢邑宰接踵而來或植滿縣之花或馴桑間之雉陶淑漸摩之後聲名文物月異而歲不同因取是書而更張之則後之視今亦猶今之視昔也麟當拭目以俟

永順縣志

卷末

序

二六

誥授文林郎知湖南永順縣事前知興寧縣奉

旨行取在任候陞主事加一級紀錄六次廣元王伯麟

識



永順縣志前序

欽惟我

皇上建極御宇德媿五帝功邁三王薄海內外凡日月  
照臨之地悉隸版圖奉正朔幅幘之廣亘古莫加  
爰

詔修一統志凡直省郡邑咸志其山川風土獻之

天府以彰王會之盛茲永順新闢疆宇儼然一大都會  
宰是邑亦奉檄屢催敢不亟修志乘顧茲地舊為  
土司彭氏所有自漢唐宋元以來皆荒畧弗可深

永順縣志

卷末

序

二十九

考有明授職宣慰司屬辰州亦未有聞人紀述軼  
事迨我

朝康熙三十年間彭姓始修永順司志一帙然皆自  
紀其土司之事一切典故撫採弗當考古者將何  
所取證焉第古無可考而地自今闕則今日之行  
事即後日文獻之徵也今我

皇上鑒彭肇槐獻土之誠改永順司為永順府以永順  
縣為附郭又設龍山一縣其保靖桑植皆設知縣  
屬府管轄



詔發帑金依內地郡縣制度一體建置而瑾以菲材合沅陵隨辰府憲袁調任茲土奉

各上憲檄飭辦理一切建置事務任大責重伏思我皇上軫念邊氓一視同仁務令數千百年辛苦墊隘之

民登諸衽席山谿草昧之俗開厥聲教各上憲欽奉

恩旨籌畫指示至再至三若職任是役少有隕越負聖恩而辜憲德罪莫大焉昔先王父作撫楚南凡有裨國計民生之事皆悉心辦理而尤以安撫苗土

為首務飭諭邊員勤加愛養瑾今者蒞此新疆倘奉職有虧是重貽先王父羞也用是日夕惶恐如瑾芒在有所幸府憲時加提命親臨指畫瑾敬謹遵行又得瑾協臺王早晚諮訪俾新闢諸政務次第告成如宣

聖諭行保甲建城池清賦興學校建祠宇開河路設渡船造橋梁置郵遞勸耕耘正風俗等項皆不敢因循不敢怠忽上以體

皇上撫柔邊土之至意次以承各上憲綏輯黎元之



盛心及先王父愛民紀

國之遺訓夜之所思日以行之日之所行夜以紀之  
及復國維務期有裨地方事無過舉乃備錄端委  
詳請題達而此心猶惴惴然恐其未必有當也至  
於山川古蹟與風土人情則隨其所見所聞一一  
劄記積之既久遂成卷帙要以備遺志資參考耳  
豈敢謂一時之草創遂可作百世之章程哉但以  
草創一時而後日之考文徵獻者得有所觀覽焉  
以是為志亦庶乎其可也因錄呈

永順縣志

卷末

序

三十一

憲府以備採擇云謹序

湖南永順府永順縣前知沅陵縣事河陽李瑾識  
告

雍正甲寅夏月

目



永順縣志前序

余纂輯邑志既已編次成帙復細行披閱而竊歎  
余之治永邑也蓋幾為慶幸幾為恐懼今始稍稍  
自慰而又切切然其有望也曷幸乎爾永順之山  
水竒秀不亞酉陽仙源而千百年來漢土隔絕不  
得與中國相通永順之民多土人少生苗剝殺惡  
習其性醇謹樸實亦稍知耕織其中秀良子弟亦  
頗有之緣隸土司千百年來不得與內地民人同  
沐教養之澤雍正七年今江西饒州叅將原永順

永順縣志

卷末

序

三十二

宣慰土司彭君肇槐獻土歸流

皇上准其請設官分治復

詔令照原額秋糧銀八十兩徵收田畝令民自首給照  
為業免其丈量於是永順之地得為盛世聲華之  
區永順之民得受

聖朝寬大之典而草昧荒陋之習蒸蒸丕變月異而歲  
不同矣此余之所以為斯地斯民慶幸無已也改  
土後

詔發帑金照內地郡縣制度一體建置而余以菲材調



任是邑奉 憲檄辦理其事竊凜然滋懼蓋懼夫  
德薄才疎肩宏任鉅易有錯誤之處且永地遼濶  
週遭一千三百餘里土苗漢籍雜處加以永定歸  
併則控制為難永之民其性愚不諳耕稼之務其  
俗陋不明禮義之閑緩之則玩急之則驚則化導  
為難改土時照舊設同知一員有潘司馬者約束  
太嚴整飭太驟土司之長官舍把人等不能安忍  
羣相鼓譟遂有圍衙聚衆之案奉

旨遣大人查審將首事擬辟其餘以軍徒發遣並安插

永順縣志

卷末

序

三十三

營縣而潘司馬亦以撫綏無術罹重咎此前鑒也  
余繼潘公之後即不至以暴急干咎而措置之間  
稍有未善以茲物議即為有負

皇恩有幸 憲德有玷家聲夫安得而不懼所賴

府憲朝夕指授黽勉奉行於是首宣

勅諭照額徵收田畝自首即行給照而民咸感激歡呼  
矣宣揚

上諭廣訓親為解說而民咸踴躍傾聽矣循行田畝教  
以浚耕易耨廣植園林蓄糞灌水而民咸勤力稼



圃無嗟饑饉矣各村分立義學以課蒙童本城建  
造書院以育俊秀而民咸知教子義方樂事詩書  
矣土司之官山任民墾種其魚塘茶園竹木樹林  
崖蠟等項令民採用一無厲禁並不存為公家之  
物而民咸優游往取視若已有矣善者獎之更為  
詳給匾額惡者懲之更為詳加禁錮而民咸激勵  
愧悔樂於為善矣河灘高險開之以通舟楫山嶺  
崎嶇修之以平道路而往者來者視若坦途矣民  
業既安民心既定奉發

帑金爰議建置於是建城垣以壯金湯則樓閣凌霄  
雉堞翦漢儼成都會之區興學校以煥宮牆則堂  
廡飛雲門枋耀日蔚起文明之氣修祠宇以祈福  
佑則廟貌神威風雷揚厲人民望之歛生昭事之  
心衙署有建而堂室備具可以議政可以臨民營  
汛有建而伍卒寧居可以保固可以禦防市鎮有  
建而塵市鱗列可以居貨可以通商橋梁有建而  
亭臺掩映車馬馳逐烟柳翦然如在畫圖中自興  
造以來工匠日以千計夫役以數千計築之登登



削之馮馮聲聞數十里外而工師挾藝以來效能  
獻技一無怨咨之語人夫負襁而至受值赴功一  
無愁嘆之聲行其田野而童叟羅拜於馬前值厥  
歲時而父老稱祝於堂上余實不自意工程迅速  
人心鼓舞有如此然豈余之力哉皆我

皇上恩施浩蕩

各上憲惠愷旁洽暨 府憲指示周詳余但勉力  
遵體不至預越以免於罪戾而先王父撫楚愛民  
之心庶幾克慰即余心亦稍稍自慰矣然土民雖

永順縣志

卷末序

三十五

已安業而生養之道未周子弟雖已向學而庠序  
之教未深工程雖已完竣而 部科之文未到其  
最大者永順地廣民多報田三百餘頃止納銀八  
十兩里民咸願陞科納賦不敢詳達然遲至數十  
餘年後亦必按則陞科但永地山高水冷田土磽  
瘠十畝之田不及中州一畝之入必照道州下下  
則起科乃為得宜此後來有司之責也學宮鼎建  
黨塾並興兩次觀風亦稍成文理曾經詳請具  
題設學取進生童俟



郡下之日學衙考棚尚須暨造春秋祀典每年遵例設  
祭而禮樂各生尚待充補文物典禮亦待後來者  
之建議夫天下賢良衆多豈無十倍百倍於余者  
悉心愛養殫力教誨補偏救弊以動余之所不逮  
若接踵至止者能使民間日有起色人文日見昌  
熾傳之千百年長樂熙皞則斯地斯民其為幸當  
何如也惟是永順既為新闢歸流之邑凡事之當  
行必詳議報可方敢舉行雖案宗具在班班可考  
茲初編志乘備載之恐失於煩竟畧之恐失於簡

惟舉其大端撮其要務使無缺遺之譏至於名宦  
良吏文學名士騷客遊人流寓題咏著作凡有關  
於吏治及可備採錄者尤宜悉登余以匆匆奉遷  
不克久待惟賴後之君子共勦盛舉余望甚厚也  
是役也起於壬子春成於甲寅秋叅校剞劂閱三  
載而告竣例得附載謹序

河陽李瑾再識



永順縣志前序

嘗讀書曰光被四表又曰聲教訖於四海而詩亦有曰自西自東自南自北無思不服竊以為古帝王之盛德豐功磅礴宇內垂之典謨咏之篇什者皆往事也今也恭逢

盛世則有以身親之我

朝應運而興

聖聖相繼篤祐

今上文武聖神超越千古歲在癸卯續承大統孝治天

永順縣志

卷末

序

三七

下澤及昆蟲草木薄海內外草面草心越五年丁未以桑保兩土官殘虐

特允改流之議一時蚩蚩土衆如嬰兒獲慈母明年永順宣慰使彭肇槐自願改土歸流

奏請報可因析永順龍山為二縣並改保靖桑植為縣而置郡以董之余原守辰郡李侯宰沅陵已酉之秋先後奉調未永所足尚者民風淳樸不事奢華惟久苦土官苛政疲憊難堪且染於陋習余兢兢焉仰體



皇仁 憲德休養教誨未敢少疎庚戌春又蒙

持旨免賦一歲嗣照原額僅納秋糧一時閭閻婦子歡  
呼匝地咸嬉遊寬大更賴李侯夙夜匪懈殫心竭  
力五載以來勸耕讀崇禮讓開修水陸道途承辦  
城垣

廟署有條不紊秩然振興甲寅春夏經營初備而李  
侯遷永順別駕余亦移湖北糧儲李侯乃記其民  
物風土新聞事蹟編次成帙問序於余披覽之際  
因思夫形勝猶是昔日之山川也戶口猶是昔日

永順縣志

卷末序

三

之黎庶也而其易險阻為蕩平出水火而登衽席  
與夫城郭之輝煌風俗之於變則非復昔日之觀  
也於是見覆載之大兆民之廣我

皇上宵旰勤勞雖窮荒僻壤一絲一粟無微不周將書  
之所載詩之所稱不已身逢其時目擊其事歟然  
而古今相較揆厥事功我

皇上實賢於堯舜遠矣是誌也自一邑而論則為山陬  
之記載合天下之邑而觀則為一統之宏規今者  
李侯特為始基異日文明丕煥余於永民猶有厚



望馬是為序

音

雍正十三年歲次甲寅夏六月知湖南永順府事  
長白袁承寵丹圃氏題

永順縣志

卷末游

三十九



永順縣志前序

邑之有志猶國之有史也史載當代之禮樂兵農與夫因革損益國計民生之事以為後代之徵信志記一邑之沿革建置星野城社賦役疆界及山川官師人物藝文以脩後人之稽考是志之有關於政治無殊於史也雍正八年我

皇上詔令天下督撫飭取各郡邑志書進呈

御覽以成 大清一統全志獨是永邑新闢諸事創始未暇纂修司牧者不無遺恨焉然亦無足怪蓋永

永順縣志

卷末

序

四十一

邑原屬土司管轄自晉至今千餘年不通聲教雍正五年土官彭肇槐憫茲土久居溪谷不克耀於光明乃繪圖呈獻詳請 各憲題遵改土歸流我

皇上中外一統垂念土司呈獻之誠不忍向隅俯允其請

詔令督撫各憲查議善後事宜旋蒙

各憲議請永順改為永順府分永順龍山兩邑而永順附郭焉先是桑植保靖兩土司桀黠殘虐魚



肉土民

詔令設流至是亦改為兩邑均隸永順但永順既設郡邑不有賢令何能撫綏沅邑李侯才堪肆應廉能夙著各憲詳

題調補永邑下車以未息惠頻施撫綏得宜每遇朔望宣講

聖諭化導愚頑并遵 制憲邁 撫憲趙 郡守袁條約實力奉行又復不辭况瘁親臨巖村僻野編立保甲嚴查奸匪去暴安民每至其地即令保甲傳

永順縣志

卷末 序

四十一

諭土衆諄諄勸勉均賦役清疆界設義學舉節孝輯和兵民養恤孤幼不年餘而風移俗易與中土同江山滙靈人文秀發殆天之有意闢茲土乎嗣是各憲議

題建立郡城廟宇衙署悉於首邑專司而李侯布畫周詳不遑朝夕先議建立土城李侯慮難垂久詳建石城 郡守袁可其議共捐養廉銀四千餘兩又不逾年而城郭巍然廟宇衙署輪焉奐焉儼然一大都會也今城工告竣百度維新且政教覃敷



民樂熙皞 郡守袁陞湖北糧道李侯亦陞本郡  
別駕公餘之暇慮永邑新闢不有志乘將來不無  
杞宋之恨於是纂修邑志志成欲丐余言以余久  
歷苗疆先年彈壓鎮算保靖苗民畏服兩任於茲  
蒙 上憲薦陞永順本協協鎮且同仕一郡知其  
原委余雖賦質赴桓何能為文然既同事有年不  
敢他辭惟就耳之所聞目之所見明其創建之由  
化行之速以見李侯之廉能如此辛勤如此千餘  
年不通聲教之區而一旦與內地並埒如此他日

永順縣志

卷末

序

四十二

詔取邑志益見新闢苗疆變成雅俗仁漸義摩不且登  
道一風同之治也哉即後之宰斯邑者稽其所自  
見其不久化成觀感興起亦可法而可宗也謂非  
永邑之幸也歟余故曰志之有關於政治無殊於  
史也是為叙

協鎮湖南永順等處地方統轄永定保靖二營副  
總兵官加三級紀錄三次王進昌撰



原叙

昔唐虞之世苗民逆命帝誕敷文德舞干羽於兩階而有苗格成周盛時海不揚波越裳氏知聖人在位遂重譯來朝良因德盛化神感召捷於影響非偶然也我

朝自定鼎後仁漸義摩禮陶樂淑

列聖相承涵濡煦育者迄今百有餘年故不獨沐浴膏澤者洽髓淪肌卽如永順介在要荒木食卉衣罔識文物冠裳之盛亦以

永順縣志

卷末

舊志序

鍾序

四三

國家聲教所訖不覺革面革心於雍正五年歸流獻籍

世宗憲皇帝憫其顛愚允其効順析其地爲兩縣而以新設之保靖桑植附之永順縣爲附郭首邑先後官是土者率皆勤加教養注意撫綏復搜輯祀典賦役風土人物之屬勒爲邑乘越數載而書成郡守李君問序於余予喜其宣

上德意易俗移風俾蠻烟瘴雨之鄉悉霑我

皇上化日光天之治豈不庶哉吾因之有感矣大治



詔授中憲大夫湖廣湖南驛鹽長寶道按察使司副使  
北平鍾昭撰并書

俗使遐陬僻壤咸底熙皞是非久道化成曷克臻  
此粵稽漢唐宋以來甯有是耶然則我  
朝德教洵足姬堯舜而埒成周也夫是爲序首  
乾隆十年歲在乙丑仲春 穀旦



原序

志書之作由來舊矣內史掌邦國外史掌四方凡都會郡邑山城巖疆莫不有志以載封域之所自始星土之所由分而山川風俗學校人才皆可一覽而得其有裨於政治者甚大永順苗土雜處相傳爲彭氏竊據雖歷奉正朔而漢土隔絕不通聲教者千餘年我

朝龍興

聖聖相繼仁德覃敷薄海內外俾無一夫之不獲故從

永順縣志

卷末

舊志序

明序

四十五

古未闢之地率皆樂志輸誠稽首待命永順縣屬此其一也改歸之後苗也而民之土也而流之山巔水隈也而城郭市肆之密箐平莽之區人跡不到今則東西南朔延袤千里宮墻城闕佳氣鬱葱且風俗潛移默化短裙椎髻之蠻一變而爲衣冠文物之彥列鬢序者有人奮鷹揚者有人彬彬郁郁非復山巒草昧之舊已十數年於茲矣使者癸亥之春奉

命觀察楚南諮訪吏治民風稔知苗獠服畏邊圉晏然



未始不嘆司牧者之善承 方召撫綏之謨而工  
於經營布置也永順王命涖任五秋因報最候推  
思爲善後之計重錄志板以垂永久揆其意豈以  
要譽飾名蓋深見苗性之不常輯和之非易欲後  
之司土者披覽圖籍曉然於前人經始之難而率  
由章程相安無事庶幾哉安土苗以安民安民卽  
以安

國以不負

聖天子安邊柔遠之至意云爾余嘉其志閱其錄送權

永順縣志

卷末

舊志序

明序

罕六

乘因爲之詮言書首

乾隆九年歲在甲子孟春下浣湖南長沙等處提  
刑按察使司按察使長白明德題

